

2 तिमोति तिमोतिकु पौलुसना रोंडो सिट्टि

इद सिट्टिता बारेमते गिचचो परिचयम

रासतोना पोरोल: पौलुस

रासता कालम: इसवि सन 67

इद तिमोतिकु पौलुस रासता रोंडो सिट्टि आंदु. पेनदा बेसता कबुरतुन वेहताहेंका ओन्क जेलुंक होनापीता. जेलुंक होंचि ओर वेल्लेन कस्टाल्क बोगांचेक मंतोर. जेलते ओर हायनाल आतोर. अय्नागानि ओना मर्रिनसोंटा तिमोति सामिना विस्वासमते इकिचचो गट्टि पडना इंचि इद सिट्टि रासतोर.

इव आकिर रोजकु आंदु, इव रोजकुने निमे तप्पुड बोदां वेहानोरगटाल, बोगमतनम कियानोरगटाल इका सतता सुकाल्कुनाहाटीगे आसेते मनानोरगटाल जेगर्ता मन. बारित्ते इसोंटा लोकल्क ओर्क नच्चुता पोल्ले वेहनाहाटी कराहनोर्कुने हेळाहंतुर. अदुनहाटी पेनदा सत्तेम पोल्लेतुन वेहालय निमे बस्केळ्क तयारते मन. इल्हा पौलुस इद सिट्टि रासि तिमोतिकु दैरनेम हीतोर.

बगा बतल मंता

जोहार आनि परिचयम 1:1-2

स्तुति आनि किरिस्तु वेहताप पिस्साना बारेमते बोदां 1:3-2:13

तेल्पिच्चि वेहमळ आनि वेंरे वेहमळ 2:14-4:5

पौलुसना सतता परिस्तिति 4:6-18

आकिरता बोदां 4:19-22

1 पेनदा इच्चाताहेंदाल किरिस्तु येसुना प्रेरित आता पौलुसना इद सिट्टि आंद. किरिस्तु येसुनपोर्गे विस्वासम इरते, बस्केळ्क पिस्सना पिस्वर दोर्कता इंचि पेन पोल्ले हीसि मत्ता, इदुना बारेमते वेहनाहाटी नाकुन लोहचियमळ जर्गता.

2 नावा पावरमगल्ला मर्रि तिमोतिकु नना रासतन. नीकु मना पेनबाबनहेंदाल, सामि किरिस्तु येसुनाहेंदाल कुर्पा, दया, सांति दोर्किकांटी.

दन्यवाद आनि दैरनेम

3 नावा पारतनाने नीकुन बस्केळक मति कीसेके, ना तादो-बाबुरालेह्का नना मनसुना पोल्लेते, बद पेनदद अय्ते सेवा कीसंतनो, अद पेनदुक दन्यवाद वेहचंतन.

4 नावाहाटी निमे पोंगागोटता कांडेरतुन मति कीसि नना नर्का-पिय्यल नीकु कलियाना इंचि इच्चा कीसंतन, इवटेन नावा आनंदम पुरागा आंता.

5 नीवा आ सत्तेम विस्वासम नाकु मति मंता. आ विस्वासम, मुन्ने नीवा काको लुइस आनि नीवा यावल युनिसनगागुडा मनुंदु. अदे विस्वासम निहगागुडा मंता इंचि नाकु बरोसा मंता.

6 इदुनहाटी नना नीकु मति कीसि हियानद बतल इत्ते, नना नीवा पोर्रो कय इरतस्के, पेनदाहेंदाल नीकु उंदि वरम दोर्कता. अद वरमतुन निमे बस्केळक एल्गिच्चि इरी.

7 बारित्ते मनाकु पेन हीता आत्मा मनाकुन पिरकिर्क किय्यका, मनालोप्पो अद बलम, पावरम आनि ओक्केतुन निहंता.

8 अदुनहाटी मना सामिना बारेमते आयि, ओनाहाटी जेलने मनना नावा बारेमते आयि वेरेतोर्क गवाइ वेहालय बस्केने सिग्गु अरमा. दानकु बदुल, बेसता कबुरतुन वेहनाहाटी पेन हीता बलमते निमे नातोनि तकलिष्क सहन कियालय तयार मन्नु.

9 पेन मनाकुन कापाळसि, दाना पवित्र पोल्लेते केयता. इदंता मना कबाहकुनहेंदाल जर्गाहिल्ले गानि सिराप ओना पिलान परकारम आनि ओना कुर्पाहेकेन जर्गता. ई दया-मायातुन पेनबाबाल मनाकु ई दुनिया पुट्टका मुन्नेन किरिस्तु येसुनाहेंदाल हीतोर.

10 गानि इंदके इद पोल्ले, मनाकुन कापाळना किरिस्तु येसु वाताहेंका मनाकु तेळियसोत्ता. ई किरिस्ते हामुरतुन रद्द कीसि, बेसता कबुरताहेंदाल पिस्वरतुन आनि बस्केळक जीवाते मनानदुन पलाते अरहतोर.

11 इदे बेसता कबुरतुन प्रचार कियनाहाटी प्रेरित अल्हेन कराहनोर इंचि नाकुन निलाहमळ जर्गता.

12 इदुनाहाटीगे नना इद जेलते तकलिष्क बोगांचेक मंतन. अय्नागानि नना सिग्गु अर्नीन. बारित्ते नना बोनपोर्रो विस्वासम इरतन ओर नाकु एर्के. इंका ओर नाकु बतल अय्ते अप्पजेपतोर* अदुन, मल्सि वायाना आरोजु वायनदाका कापाळा परांतोर इंचि नाकु बरोसा मंता.

* 1:12 बद अय्ते नना ओन्क अप्पजेपतनो.

13 किरिस्तु येसुना लोप्पो मनना विस्वासम आनि पावरमताहेंदाल निमे बव सत्तेम पोल्लें अय्ते नाहेकेटाल केंजतिनो, अवुन पीसि वेरेतोराहाटी मन्नु.

14 मनालोप्पो मनना पवित्र आत्माता बलमतोनि, नीकु अप्पजेपता मंचितनमतुन निमे कापाळकुन.

15 आसिया राज्येमते मनानोर अंटोर नाकुन होळसि होत्तुर इत्ता पोल्ले नीकु एरपाटे. अव्ते पुगिलुस आनि हिरमुगिनेसगुडा मंतुर.

16 नावा कय्कुंक बेडी वाटसि मंतां इंचि सिग्गु अर्काकोटा, उनेसिपुस्स इनानोर, नाकु ऊके-ऊके कलियसि नाकु वेल्लेन दैरनेम हीतोर. सामि ओना कुटुंबमपोरें दया हुप्सिरकांटी.

17 अचोने आयका ओर रोम सहरते वातस्के, नना दोर्कनदाका नाकुन मनसु तासि प्हक्सेक मत्तोर.

18 नना इपीसि सहरते मननेंके, ओर नाकु वेल्लेन रकाल्कुना सहायम कीतोर नीकु अय्ते बेस तेळियसि मंता. सामिना मल्सि वायाना आ रोजुने, ओनपोरें दया हुप्सालय पेन सहायम किय्यि इंचि नना कोरसेक मंतन.

2

येसु किरिस्तुना बेस सिपाइ आयना

1 ना मर्रि तिमोति, किरिस्तु येसुनगा मनना कुर्याते निमे बेस ताकतवर आम.

2 वेल्लेन मंदि लोकुल्कुना मुन्ने नाहेंदाल निमे केंजता पोल्लेन, बोर अय्ते वेरेतोरक कराह परांतुर, असोंटा विस्वासमलायक मनानोर्कुंक अप्पजेप्पा.

3 किरिस्तु येसुना वरोर बेस सिपाइनालेसी निमेगुडा तकलिप्क बोगांचा.

4 लडाइहाटी पेयसता बोरे सिपाइ वट्टि सम्सारम पोल्लेने हिरकोर. बारित्ते ओन्क अद नवकरि बोर अय्ते हीतोरो ओन्क कुसि हियमळे ओना गुरि मनंता.

5 अल्हेने वरोर कुस्ति अर्नानोर नियमकुन पीसि कुस्ति अर्काकोटे ओन्क किरिटम दोर्को.

6 कस्टपळना कास्तकारि मनकंक, पंडता पंटाता मोदाटा पाल एतना अदिकारम मंता.

7 नना वेहना पोल्लेना बारेमते विचारम कीम, अन्नि पोल्लें तेळियानाहाटी सामि नीकु बुद्दिद हियानुर.

8 नना वेहता बेसता कबुर परकारम, दाविद राजाना वंसंमते पुटसि, हामुरताल मर्रा जीवाते तेदता येसु किरिस्तुन मतिते इर्ग.

9 इदे बेसता कबुर वेहताहाटीं नना जेलुंक होत्तन. वरोर तप्पु कीतोना कयकुंक वाटताप नावा कयकुंक बेडीं वाटतुर. गानि पेनदा पोल्ले मात्रम बेडिने दोह्चि हिल्ले.

10 अदुनहाटींगे नना, किरिस्तु येसुना लोप्पो दोर्कना मुक्ति पेन पेरतोर्क, बस्केळक मनना दाना महिमातोनि दोर्कना इंचि बच्चुं कस्टाल्क अयना सहन कीतन.

11 इद पोल्ले विस्वासम कियनलायक मंता, अद बतल इत्ते, ओक्कला मनम ओनतोनि हातोम इनानय्ते, ओनतोनि पिस्संतोमगुडा.

12 मनम ओर्सकुंचेके मनानय्ते, ओनतोनि राज्येम इंका कीतोम. ओक्कला मनम ओन एरपाट किय्योन इनानय्ते, ओर इंका मनाकुन एरपाट किय्योर.

13 मनम विस्वासमलायक मनाकोन्ना ओर मात्रम विस्वासमलायक मनंतोर. बारित्ते ओनद ओर बस्केने एरपाट किय्योन इंचि इन्नोर.

पेन पेरता सेवाकुड

14 इव अन्नि पोल्ले निमे ओर्कु मति कीसि हीसेक मन्नु. इंका केंजानोर्कुन हेळाहनालायक बतले पायदा हिलुवा पोल्लेनाहाटीं लोल्लिं कियामन्नि, इंचि ओर्कुन सामिना मुन्ने निलाहचि दटांचि वेहा.

15 बस्केने सिग्गु होनाकोंटा, पेनदा पोल्लेता सल्लेमतुन बरोबर कराहनोनलेसीं पेन निलहाता वरोर सेवाकुड आसि मनालय कोसिस कीम.

16 बक्ति हिलुवा वट्टि पोल्लेनाल तप्पिचुकुन, असोंटा पोल्ले लोकुल्लुकुन हेळाहचि पेनदागटाल इंकिचो लक्कु कीतां.

17 असोंटा लोकुल्लुकुना वळ्ळकमळ उंदि कुल्लिसि-कुल्लिसि पेद्दागा आयना पुन्नुलेहका मनंतां. हुमिनयुस आनि पिलेतुस असंटोरे आंदुर.

18 ओर इव्वुरगुडा सल्लेम हरदाल तप्सोचि, हासि मरी जीवाते तेदमळ आसोत्ता इंचि इंतुर. इसोंटा पोल्ले वळ्ळिकसि ओर इच्चुर लोकुल्लुकुन विस्वासमतुन हेळाहचंतुर.

19 गानि पेन दोहता पुनादि बस्केळक नित्तिसि मनंता. अद पुनादिपोर्रो, “सामिंक ओना लोकुल्लक बोरे आंदुर, ओन्क एरपाटे,” आनि “सामिना पोरोल एताना हरेक मनकल, तप्पुड कबाहकुनाल लक्कु मनगोम,” इंचि सिक्का वाटसि मंता.

20 सिरमंतुल्लुकुना लोहकुने सिराप एंडि-बंगारमता बोळिं गें मनंतां इंचि आयो, अगा कट्टेतव आनि तोळितवगुडा बोळिं मनंतां. अव्ते एक्को इलुवातवुन पेद्दा-पेद्दा कबाहकुनेन वाळकुंतुर आनि तक्को इलुवातवुन बारे बस्केळक वाळकुंतुर.

21 अदुनहाटीं बोरन्ना मनकल इलुवा तककोतोर मनानय्ते, ओर पेद्दा-पेद्दा कबाहकुने वाळकुनना बोळिलेहकाटोर आयनुर. अस्के ओर पवित्र आसि ओना मालकुना कबळक ओज्जंतोर पजा अन्नि तीरकुना बेसता कबाहक कियालय ओर तयार मनंतोर.

22 लेय्यातनमते वायाना कराब इच्छानाल लक्कु मन. पवित्र मनसुने सामिक आरादना कीसेके मनानोरतोनि कलियसि नीतिते, विस्वासमते, पावरमते, सांतिते मनालय कोसिस कीम.

23 तेल्वि तकको अल्हेन बेकार पोल्लेनाल लक्कु मन. नीकु अय्ते एरपाटे, असोंटा पोल्लें वाद-विवाद जगडाल्कुन पुटसंतां.

24 इंका सामिना सेवाकुड बस्केने जगडम कियाकोंटा, अंतोरपोरों दया हुप्पिचानोर आयगोम, ओर कराहनालायक मनगोम, ओप्केते मनगोम.

25 नीवा विरोदमते वळ्ळकानोर्कु क सांत मनसुने तेळियागोटिस वेहा. सत्तेमता बारेमते तेल्विचकुननाहाटीं पेन ओर्कु मार मनसु हिय्यार.

26 अस्के ओर्कु बेस तेल्वि वासि, ओरा सतता इच्छातुन दोर्किच्छुकुननाहाटीं देय्यमता कयदाल इळबळानुर. बारित्ते देय्यम सतता इच्छान दोर्किच्छुकुननाहाटीं ओर्कुन दोह्चि वाटसि इर्ता.

3

आकिर रोजकुना तकलिप्क

1 आकिर रोजकुने इरगा तकलिपकुना कालम वायना मंता, इद मति इर्ता.

2 बारित्ते अव रोजकुने मनकालोर सतता बारेमतेन विचार कींतुर, कोल्लन पावरम कींतुर, सतता बारेमते पेद्दा-पेद्दा पोल्लें वेहकुंतुर, गरति मनंतुर, बदनाम कियानोर आंतुर, तल्लुर-बाबोना पोल्ले केंजुर, दन्यवाद वेहुर, अपवित्र आंतुर,

3 दया-माया मन्नो, मापि कियना मनसु मन्नो, वेरैतोरा अपमानम कींतुर, ओप्केते मन्नुर, ओरा जीवा नोय्यो, जिवरासिनलेहका कींतुर, बेसतदुन हय्सुर,

4 पसांचंतुर, मंचि-सेड्डा विचारम किय्युर, सतता बारेमते पोंगुडतनम पोंगंतुर, पेनदा पावरमकन्ना सुकमतुने एक्को पावरम कींतुर,

5 पलाताल पेनदा बक्ति कीतापे दिसंतुर गानि आ बक्तिता बलमतुन मात्रम नम्मुर. इंसंटोरगटाल लक्कु मन.

6 ई लोकलकुने इच्चुर इसंटोर मंतुर गदा, बव मुर्ताहक अय्ते कमजोर मनसुने पापमता मोताते रका-रकालकुना आसेने निडिस पिस्सेक मंतां, अव मुरताहकुना लोहकुने होंचि अवुन ओराहेके कीकुंतुर.

7 इव मुर्ताहक बस्केळक करियसेकेन मनंतां, गानि सत्तेम बतल अव तेल्पिचकुन्नों.

8 यन्नेस, यंब्रेस इनानोर मूसांक अड्डम तिरियतुर. ओरालेसीगे ई मनकालोरगुडा सत्तेमकु अड्डम तिरियंतुर. ई मनकालोरा बुद्धि हेळसोंचि विस्वासमते हर्रि तप्सि मंतुर.

9 गानि ईर इंका मुन्नेळक होना पसर. बारित्ते मूसांक अड्डम तिरियता इव्वुर मनकालोर बल्हा तेल्वि तक्कोतोर इंचि अंटोर्क तेळियसि होत्ता, अल्हेन ईरा तेल्वि तक्कोतनमगुडा अंटोर्क तेळियसि होन्नार.

पौलसना आकिरता आदेस

10 गानि निमे नावा कराहमळतुन, ताकमळतुन, नना पिस्सना उद्देसमतुन, विस्वासमतुन, ओप्केतुन, पावरमतुन, नावा दैरनेमतुन,

11 नना अंताकिया, इकोनिया आनि लिसरा इनना सहरकुने बोगांच्ता तकलिष्क, नना अरता बादां, इव अन्नि नीकु एरपाटे मंतां. आयना इव अन्नि तकलिपकुनाल सामि नाकुन कापाळतोर.

12 किरिस्तु येसुना लोप्पो पेनदा बक्तिते ताकंतन इंचि इच्चा ईराना अंटोर्क कस्टाल्क अय्ते वायानुंगे.

13 गानि कराब कियानोर, मुळाहनोर, वेरतोर्कुंका दोका हीसेक, ओर दोकाते अरसेक इकिच्चो कराब आंतुर.

14 गानि निमे बतल करियतिनो, बतल विस्वासम कीतिनो आनि अवुन निमे बोनहेंदाल करियतिन नीकु एरपाट मंता. अवुने उंदेतीर ताकसेक मन.

15 अचोने आयका, निमे सिन्नास्केटाल पवित्र दर्मसास्त्रमता पोल्लेन करियतोन आंदिन. अव नीकु किरिस्तु येसुनपोर्गे विस्वासम इरते दोर्कना मुक्तितुन दोर्किचकुननाहाटीं बुद्धि, तेल्वि हीतां.

16 दर्मसास्त्रमते रासि मनना पूरा पोल्लें पेन वेहताहेंकेन रासतव आंदुं. अव पोल्लें कराहनाहाटीं, तेळियागोट्सि वेहनाहाटीं, तप्पुन सुदरांचनाहाटीं आनि नीतिमंतुल्क आयानाहाटीं टेरनिंग हियालय कबळक ओज्जंतां.

17 अद बल्हा इत्ते, दर्मसास्त्रमहेंदाल पेन दाना हरेक मनकन पुरागा दानालायक कीसि, अन्नि तीरकुना बेसता कबाहक कियनाहाटी, ओर्कुन तयार कीता.

4

1 पेनदा मुन्ने आनि जीवाते मत्तोरद, हातोरद न्यायम कियना किरिस्तु येसुना मुन्ने इंका ई दुनियाते ओना मर्ग वायमळतुन आनि ओना राज्येमतुन मुन्ने इरसि नना नीकु आदेस हीतन गदा, इद दुनियाते पेनदा मुन्ने, मर्ग वासि राज्येम कियानुर अस्के जीवाते मत्तोरद आनि हातोरद न्यायम कियना येसु किरिस्तुना मुन्ने, नना नीकु दटाचि वेहानद बतल इत्ते,

2 पेनदा पोल्लेतुन, टाइम दोर्किना दोर्काकोन्ना प्रचार कियालय तयार मन, अन्नि तीरकुना ओप्केते ओर्कु कराहसेके, दटांच्सेके तेळियागोटिस वेहा.

3 नना इल्हा बारि वेहासेक इत्ते, बेस बोदातुन लोकुल्क केंजुर असोंटा कालम वायना मंता. ओर ओरा मनसुंक वाताप ताकंतुर, ओरां दुर्दा केव्कुंक बतल अय्ते केंजमळ इस्टमो, असोंटा पोल्ले कराहना गुस्कुन सततातोनि कल्पकुंतुर.

4 ओर सत्तेम पोल्लेन केंजुर, तयार कीसि वेहना कतां केंजालय दांतुर.

5 गानि निमे बसोंटा परिस्तिती वायिना, पजोळ्क होनाकोंटा नित्तिसि मन. तकलिष्क वाते सहन कीम, बेसता कबुरतुन वेहाना नीवा कबळतुन कीसेके, निमे कियना पेनदा सेवाता कबळ पुरागा कीम.

6 नना अय्ते पेनदुक मोक्कु हियना पट्टुनगड्क* एवतन. दुनियातुन होळसि होनना नावा वेला दग्गेर्क एव्ता.

7 सामिना पोर्रीटा विस्वासम बारेमता लडाइते, नना लडाइ बेस कीतन, नना बेस वित्तुतन. नावा विस्वासमतुन नना कापाळकुत्तन.

8 नावाहाटीं ईर्सि मत्ता नीतिता किरिटम, सत्तेमते न्यायम कियना सामि, ओर मल्सि वातानाडु नाकु अदुन हीतोर. सिराप नाके आयो गानि, बोर-बोर अय्ते ओर दिस्सना रोजुन पावरमते एदुर हळसेक मंतुरो, ओर्कु अंटोर्कगुडा हीतोर.

तिमोतिंकु पौलुसना आकिर पोल्ले

9 बच्चोर बिराना आते अच्चोर बिराना निमे नहगा वायाना कोसिस कीम.

*

4:6 पट्टु बलि पीटम.

10 बारित्ते देमासु इनानोर ई दुनियाता पावरमते नाकुन होळसि तेसलोनि सहर होत्तोर. क्रेसेंस इनानोर गलातिया एरियाते होत्तोर आनि तीतु इनानोर दलमतिया राज्यमते होत्तोर.

11 सिराप लूकाले नातोनि मंतोर. निमे वायनैके मरकुसुन नीतोनि पीसि वा. सेवा कबळते ओर नाकु वेल्लेन सहायम कीतोर.

12 तुकिकुस इनानोन नना इपीसि सहर लोहतन.

13 त्रोआस सहरते करपुस इनानोना लोन नना नावा कोट ईसि वातन. निमे वायनैके दान पीसि वा. अल्हेने नावा पुस्तकाल्क, विसेस कीसि तोलतोनि तयार कीता, हुटसि मत्ता पुस्तकाल्कगुडा पीसि वा.

14 सिकंदर इनना कम्मरि नावाहाटी वेल्लेन कराब कबाहक कीतोर. ओर कीता कबाहकुन पीसि, सामिगुडा ओन्क अल्हे हियानुर.

15 मनम वेहता पोल्लेंक ओर वेल्लेन अड्डम तिरियतोर. अदुनहाटी निमेगुडा ओनागटल जेगर्ता मन.

16 नावा न्यायम जर्गनैके, नना मोट्टा मोदाटा जवाब हीतस्के, नावाहेंदाल जवाब हियालय बोरे मना हिल्लुर. अंतोर नाकुन होळसि होत्तुर. ओर अल्हा कीतदुनहाटी पेन ओर्कुन लेक्का तल्काकोटेन बेस.

17 गानि नाहेंदाल बेसता कबुर अंतोर्क एव्सि, दान यहुदि आयवोर अंतोर केंजगोम इंचि, सामि नाकु तोळ मंचेके नाकु बलम हीतोर. इल्हा नाकुन सिंहम तोळदाल कापाळतोर.

18 सामि मनना स्वर्ग राज्यमते नना होनालय, ओर नाकुन हरेक कराब कबाटाल कापाळनुर. ओनके बस्केळताहाटी पेद्दातनम दोर्कि. आमीन.

पौलुस आकिरते अंतोर्क जोहार कीतोर

19 पिरिसकिला, अकविला आनि उनेसिपुस्सना लोतोर्कुक नावा जोहार वेहा.

20 इरास्तुस इनानोर कुरेंति सहरते आगतोर. तोरोपिमुस इनानोर बिमार मत्ताहाटी नना ओन मिलेतुस इनना सहरतेन होळसि वातन.

21 पीनि कालम वायाका मुन्नेन निमे इगे वायना कोसिस कीम. इबुलुस, पुदेंस, लिनुस, क्लवदिया आनि कळमातोर अंतोर दादालोर नीकु जोहार वेहचंतुर.

22 सामि नीवा आत्माकु तोळ मन्निर. सामिना कुर्पा नीकु तोळ मन्निकांटी.

Pavitra Polle
Aheri Gondi: Besta Kabur (Bible)

copyright © 2020-2022 Wycliffe Bible Translators, Inc.

Language: (Aheri Gondi)

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 1 May 2025 from source files
dated 1 May 2025

856c9a76-2de1-5675-855a-28be9a349068